

13 shtator 2013, Prizren

KOMUNIKATË PËR MEDIA

Publikohet Analiza “Rinia dhe Transparenca: Të përjashtuar apo të injoruar?”

Në kuadër të projektit “Rritja e pjesëmarrjes përmes Mediave Sociale” të përkrahur nga Programi për Zhvillim i Kombeve të Bashkuara (UNDP), EC Ma Ndryshe të premtën në Prizren ka publikuar Analizën e titulluar: “Rinia dhe Transparenca: Të përjashtuar apo të injoruar?”. Analiza shqyrton transparencën e komunave të Prizrenit dhe të Gjilanit në raport me të rinjtë që jetojnë në këto dy qendra urbane. Të premtën janë shpalosur të dhënat për komunën e Prizrenit.

Të gjeturat e këtij raporti burojnë nga hulumtimi respektivisht anketimi i të rinjve të shkollave të mesme dhe të universiteteve të Prizrenit. Në anketë janë përfshirë 200 të rinj që i janë përgjigjur pyetjeve në lidhje me funksionimin e pushtetit lokal, transparencën dhe përfshirjen e publikut dhe të rinjve në vendimmarrjen komunale. Hulumtimi është kryer në hapësirat shkollore e universitare përkatësisht në oborret e tyre dhe në rrugë.

Rezultatet e hulumtimit në përgjithësi tregojnë se përfshirja e rinisë në vendimmarrjen e komunës së Prizrenit nuk është në nivel të lartë, se qeverisja është pak transparente, se rinia nuk është e përfshirë në hartimin e buxhetit komunal dhe se nuk ka konsulta të duhura me ta gjatë hartimit të dokumenteve të rëndësishme strategjike.

Anketat e kryera dëshmojnë se të rinjtë e Prizrenit mbeten jashtë procesit të politikbërjes komunale derisa përfshirja e tyre në konsultimet publike është shumë e rrallë dhe kryesisht e natyrës formale për përmbushjen e obligimeve minimale ligjore. Në të njëjtën kohë njohuritë e këtyre të rinjve në lidhje me të drejtat e tyre qytetare janë në nivel të ultë dhe nevojitet një qasje e strukturuar e institucioneve vendimmarrëse dhe e atyre arsimore por edhe e shoqërisë civile për përmirësimin e këtyre trendeve.

Të gjeturat e hulumtimit tregojnë se 61 për qind e të rinjve të anketuar të Prizrenit nuk kanë njohuri për vendimmarrjen në komunë; pastaj më shumë se gjysma e të rinjve të Prizrenit besojnë se qeveria lokale ka pak transparencë në punën e saj derisa 38 për qind thonë se transparenca është në nivel mesatar; derisa vetëm një në mesin e shtatë të rinjve prizrenas kanë marrë ndonjëherë pjesë në mbledhjet publike të Kuvendit Komunal dhe vetëm një në mesin e pesë të rinjve të Prizrenit ka marrë pjesë në debatet publike të organizuara nga komuna.

Po ashtu në Prizren 87 për qind e të rinjve të anketuar nuk kanë qenë të informuar për procesin e hartimit të buxhetit, ndërkohë që në mesin e 10 të rinjve prizrenas vetëm njëri prej tyre ka pas rastin që të paraqes problemet para kryetarit apo drejtorëve të komunës. Raporti përmban edhe rezultate tjera që shpiejnë drejt përfundimit se organet komunale kanë lënë anash apo kanë përjashtuar nga proceset vendimmarrëse një të katërtën e popullatës vitale. Ndërkaq korniza ligjore mbi të cilën bazohet vendimmarrja komunale ofron mundësi për përfshirjen e publikut dhe në këtë rast të rinjve në proceset vendimmarrëse.

Për këtë shkak EC Ma Ndryshe ka rekomanduar Komunën e Prizrenit që të:

- Ofrojë mbështetje për propozimet e dala nga konsultimet me grupet rinore;
- Aplikojë metoda moderne për konsultime dhe pjesëmarrjen e publikut, duke vënë në përdorim edhe mediat sociale;
- Shqyrtojë mundësitë e paraqitjes së vendimeve dhe informatave relevante në mediet sociale si pjesë e strategjisë së marrëdhënies me publikun;
- Përdorë teknologjitë e mediave sociale për të angazhuar publikun në dialogun qeveri lokale-qytetar dhe për ofrimin mundësisë së diskutimit dhe zhvillimit të politikave si dhe zbatimit të tyre, etj.

Analiza është shpalosur para të rinjve gjatë aktiviteteve për shënimin e Ditës së Rinisë, në bashkëpunim me sektorin e Rinisë së komunës së Prizrenit dhe organizatat rinore që veprojnë në Prizren. Analizën në tri gjuhë mund ta lexoni në linkun: <http://online-transparency.org/rpms/?page=1,1&c=1>.

Projekti i EC Ma Ndryshe “Rritja e pjesëmarrjes përmes Mediave Sociale” ka për qëllim që të inkurajojë të rinjtë e Prizrenit për pjesëmarrje në vendimmarrje lokale dhe që përmes qasjes inovative dhe edukative t’ju lehtësojë atyre kuptimin e të drejtave qytetare dhe përgjegjësisë. Për më tepër, projekti synon të ngushtojë hendekun mes pushtetit lokal dhe të rinjve duke i mbështetur ata përmes aktiviteteve të ndryshme në terren dhe në komunitet, duke përdorur mjetet sociale që janë në dispozicion gjithnjë e më shumë. Për më shumë vizitoni ueb-faqen e projektit, www.online-transparency.org/rpms.

Me respekt,

Laura Lutfiu, asistente e projektit
OJQ EC Ma Ndryshe
Rr. Saraçët, Nr. 5 - Prizren
Rr. Zeki Shulemaja, Nr. 2 - Prishtinë
www.ecmandryshe.org & info@ecmandryshe.org
+381 38 224 967 & +381 29 222 771

Analiza “Rinia dhe Transparenca: Të përjashtuar apo të injoruar?” është përgatitur në kuadër të projektit “Rritja e Pjesëmarrjes përmes Mediave Sociale”, i përkrahur financiarisht nga Programi për Zhvillim i Kombeve të Bashkuara (UNDP) dhe Projekti SMILE i financuar nga Democratic Governance Thematic Trust Fund (DGTTF).



*Empowered lives.
Resilient nations.*